





Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 3 Yangia anidakangma :



TAPAK 8

CPI(M) General Secretary
Sitaram Yechury alima nungi pilaogo

Mikel Arteta-i Arsenal den
tenangzüktepba yanglushiogo



VOL. XXI ISSUE NO. 331 (ADOK 331) DIMAPUR ROGONÜ (FRIDAY) RONGJUI (SEPTEMBER) 13, 2024 ₹ 5.00

Temjen Imna Along ya minister menden nungi anizüksüla: RPP

Dimapur, Rongjui/Sept. 12 (TYO): Minister, Higher Education & Tourism, Temjen Imna Along anema Bombay High Court-i ken o benoka aliba dak sendakba nung Rio sorkari pa Council of Ministers nungi agientsü langa lir. Ashikülak mapa tamajung inyakba yong pa tepuokdak ayutsüa akok nung pai "Normal business dispute" ka dang ta ashiba ya tezüdangtsüka lir, ta Rising People's Party ajanga Brehostibarnü sangdong ka nung ashi.

Temjen Imna Along-i ashikülak mapa inyakba ken o ya sen 125 crore indang lir aser iba ken o ya linüki metetogo, saka pai jangshitsüba yimya yagi pa dak ashikülak yimya aliba ajiteter. Ano iba ken o nung State BJP ola madokba yagi parnok dak anatsü nok ama yimya aliba sayur, ta RPP sangdong ajanga ashi.

Narendra Modi sorkari "Corruption free India" atema sangdonga lir ta State BJP-i angatetsüla. Iba yimyi jangjatsüsü mechi State BJP ya mezüung sür CM Rio dang par Minister ya menden nungi atsüngdoktsü ajungshia liasü, ta ashi.

Kohima High Court complex tasen yangluba nung dena aliba Naga nung contractor ana indang ki o jen Enforcement Directorate (ED) ajanga soita ayuba ya meimlai aliba mapa ka lir. State nung ED-i ochimashi ken o nung sodakba ibai mezüngbuba alitsü aser state nung aliba nüburtemi iba osang pelashishia agizük. ED dang PWD Engineers 10 aser contractor trok dena aliba ken o ochi nung tatem kati arutsü ajungshir, ta RPP ajanga ashi.

High Court complex tasenba indang ken o nung state PWD ketdangsur 10 dena aliba nung CBI nem memenui persecution sanction agütsüsü Chief Minister dang ajungshir.

Contractor trok den ketdangsur 10 dena lir ta CBI ajanga shiaka Rio indang sorkari prosecution sanction magütsüba ajanga yimten yimsüsür tema iba ken o nung adentsü tsüboa aliba ajiteter. Ajisüaka ozüing indang teka talang nungi jena motetsü aser iba ken o nung Kohima High Court bench ajemokdaktsüba ajanga state nung aliba nüburtem anisüingzük terabo angur, ta RPP sangdong ajangasa ashi.

Centre dang Naga yimden ken o tematiba jenjang nung jembitsü ayongzük

Kohima, Rongjui/Sept. 12 (TYO): Nagaland Political Issue atema Nagaland sorkar aser Naga nung loki tentet balala tsüngta Brehostibarnü shisadokden senden amenba nung Centre dang interlocutor tejangja aser shidak shimsü aser tang tejembidang Naga yimten ken o ministerial level nung jembitsü ayongzüka liasü.

"House-i Government of India (GoI) dang tang tejembidang ken o aser yimjung maparen tematiba jenjang nung ajungketa political level mesüra Ministerial level nung interlocutor shima jembishinüa inyakteptsü ayongzük," ta Nagaland sorkar indang odongtar aser Minister, Power & Parliamentary Affairs, K G Kenye-i State Banquet Hall, Kohima nung iba senden amenba sülen osangbener dang ashi.

GoI aser Naga nung telok tsüngta iba ken o ya tematiba jenjang, Ato Kilonser indang jenjang nung third country ka

nung jemi tenzük aser Interlocutor shim, koba tangbo 'representative' ka jenjangi aluogo, ta pai rasaa ashi.

Taoba mapang Nagaland angh inyaka alisang RN Ravi ya iba jembishinü atema interlocutor tatemtsüba liasü, saka pa Tamil Nadu nung angh inyaksü aoba sülen Centre-i AK Mishra ya representative ka ama dang shim, ta pai ashi.

Iba ken o tatsü talang ajak kanga junga jembiba sülen House-i 'negotiating party' tem - GoI aser Naga Political Groups - dang pelaba lemsatep aser ceasefire agreement tangatetba maneni wazüka ayutsü ayongzüka liasü.

House-isa Naga nung loki ajanga dang yimjung maparen indang stakeholders ajanga tangatetep kati arutsü atema telungjem nung tashi itshitsü asoshi ajaki merangtsü ayongzük.

Iba senden nung shilem agir ajungai Naga nung telungjem

asoshi asendenshir inyaksü mulungtepa liasü, ta pai ashi.


House-i Naga political groups aser linük tenzük ajanga dang telemsa tali madoktsü, telok tali paksa maotsü mesüra telok tasen metentetsü ayongzüksü pangjem, ta Minister Kenye-i ashi.

Naga nung yimten ken o jembiba telok ana - NSCN-IM aser Working Committee of Naga National Political Groups - ya document ka dang amer GoI den jembinung ajungtsü, kechiaser yamaji inyakba ajanga final solution nung mangmangba malitsü, ta House-i angatetba lemsatepa liasü.

Tang Neiphu Rio-i aniba opposition maliba sorkari Political Affairs Committee dentetba sülen Naga Political Issue ya nüburtem nem angatetdaksütsü nungdak ta angateta tanü iba senden ya ayongzük aser tarutsü nunga ayongzüksü, ta pai ashi.

(Maneni tapak 2 nung...)

L.L.Yaden kinungtsü Daisy alimai nungi pilaogo



Wt. Daisy Yaden

maneni inyakdagi.

La kinungbo den tesem balala nung government mapa inyaka jasadanga, lai teküpok tia nung alir memetetba kin aser nebertem dang merükmejutsü sayuba den sü arrba aser sü mechiba mapatem sayua liasü. La 1973 kumbo Nagaland State Social Welfare Advisory Board nung mendenbula liasü. Laisa la alidak nebertem atema mapa tajung inyaksütsü asoshi United Women Welfare Organisation Dimapur tenzüka, la masü tashi la leniba nung iba teloki mapa tajung inyaka aruogo. Item mapa tajungtemji reprangteta 2013 kum la nem Nagaland Governor's Gold Medal konang agüja liasü.

Mapang kabo la Kohima nung St. Joseph English School aser Little Floer School aser Kohima English school-tem nung tesayur inyaka liasü. Iba dakji alaka lai tanurtem dang Laishiba nung aliba otsü ashitsü jangraba agi la angati dang lasasa Sunday School tesayur kümer tanurtem dang la temang junga ali tashi sayua liasü.

La taküm piyong tesem balala nung kinungbo tajung den jangratema lia jajar, arishi kum 98 nung lai asoba chirnur 6 den semchir 16 aser punier 16 toktsür Kibuba den teti anisüingzükdaki ogo.

La asüba angashia Nagaland Chief minister, Neiphu Rio, Nagaland Deputy Chief Minister Y. Patton nati anir loki aser yimten lenirtem aser Dimapur, Kohima aser Mokochung nung osangbenertem telongjemi asür kinungertem den mangyim jashi lemsatepba osang metetdaksüogo.

ILP atema küm ana latettsü menüngdaker: JD(U) Nagaland

Dimapur, Rongjui/Sept. 12 (TYO): State Cabinet-i Dimapur, Niuland aser Chümoukedima district tem nung Bengal Eastern Frontier Regulation (BEFR) 1873 mapa kuma amshitsü telemtetba agiba atema pela agizük, ta JD(U) Nagaland State sangdong ka ajanga ashi.

Kasa mapang ILP exemption atema küm ana - December 1, 1963 aser November 21, 1979 - latetba ya menüngdak ta bilemer.

State Cabinet telemtetba nungya Nagaland nung alir non-Nagas tem iba küm ana tsüngtai

aitertemi ya Permanent Resident Certificate (PRC) aser Domicile Certificate agitetsü maangka agüja lir.

Iba category anati aitba non-Nagas ajungai kasa facility agira, yangji kecha nungdak madoker. Anungji 'category of exemption' ya ka dang alitsüla aser ibaji Nagaland State kumtetba anogo ya asütsüla, aji asünung dang mapa kuma inyakba mapang memangmangteptsü, ta JD(U) Nagaland ajanga ashi.

Ano mapang talang-lang atema ILP agütsüba ya kanga

junga asadangtsüla, aji asünung dang BEFR 1873 ya takum alitsü.

ILP agütsütsü atema Nagaland Inner Line Regulation Commission (NILRC) nungja agütsür independent governing body ka tentet nung ajungtsü aser yangji legislative aser executive tashi alitsüla, ta JD(U) Nagaland ajanga ashi.

"Nagas by Blood" aser "Nagas by Adoption" bendangtsü asoshi Nagaland nung legislation balaka alitsü nungdaker, ta sangdong ajangasa ashi.

Manipur nung aliba nüburtem yimjung langa lir: NESO

Dimapur, Rongjui/Sept. 12 (TYO): Manipur nung ita 16 tashi azüdokshia ariba tebilemtsü lemsatepa North East Students' Organization (NESO) ajanga India Ati Kilonser Narendra Modi aser Home Minister Amit Shah dangi tezüluba ka agüja liasü.

Mapang talangka mepetemesü aliba ajanga tai maket nisung zünger mezüngmai takum samaogo, ki o jen tesem ajunga nung raksaogo, state tesem ajunga nung nüburtem mulungjang nung tetsübo aita daksüogo, ta NESO shiti nung shia lir.

North East Students' Organization (NESO) nungya Assam, Meghalaya, Manipur, Mizoram, Nagaland, Arunachal Pradesh aser Tripura state tem nungi All Assam Students' Union (AASU), Khasi Students' Union (KSU), Garo Students' Union (GSU), All Manipur Students' Union (AMSU), Mizo Zirlai Pawl (MZP), Naga Students' Federation (NSF), All Arunachal Pradesh Students' Union (AAPSU) and Tripura Students' Federation (TSF) lir.

Onoki iba azüdokshi khukhua aitsür kechiaser ibai meimchir,

yimjung aser kati ka den tesunep nung alitsüba anema lir, ta ashi.

Tawa drone aser missile amshia amakba densema tensa tamajungba akumba ajanga odanga tensa mejungi aliba tali tamajungba kumdaktsür. Iba ama tasa yagi teraksa tali agütsüba dang masü saka kin tsüngta telemsa tali adokdaktsür aser yimjung teimla samaa kumdaktsür, ta ashi.

Iba lendong timtem agi kongshir aliba kija aser kibong tem den NESO nokdaka lir aser tai maket nübür takum samaba atema mang ayimer, ta ashi.

Tangatetep kati arutsü asoshi tajunglen nungi jembishinütsü ya dang lenmang lir aser iba mapang nisung ajak indang temeden, tejangraba aser tenüng wazüka yua aser akumtsüboa amshitsüla, ta NESO-i ashi.

Manipur nung aliba nüburtemi tesunep langa lir, aser ibaji kati ka angatetepba aser azüdokshi maliba ajanga dang ataloktsü.

NESO-i mapang shia Government of India aser PM dang iba ken o tajungba nung bentettsü ayongzüka aser ajungshia arur. Tensa mejungi

aliba atema tekeraba nung telangzüba nungdaka liaka telangzüba agi kanga anünga lir. Ato kilonser mapang talangka ola madokba ajanga tensa tali tamajungba kumdaktsür aser nüburtemi timtem ajak agir, shibai azüdokshi tenzük tang tashi Manipur medemdang, ta kaketshir temi ashi.

Manipur nung tensa kangasa majung lir, kong sorkar tematiba jenjang nungi tangsa temulung agütsütsü nungdaker. Iba tensa mebertetba ajanga North East ajunga nung tensa tamajungba akumtsü anameta nung lir. Anungji Government of India-i menua melie state nung yimjung lidaktsütsü asoshi mera tajung agitsü ayongzük, ta NESO ajanga ashi.

PM dang ola adoktsü aser Manipur tsüngtong arua semdanga tensa asadangtsü aser civilian nem security agütsütsü ayongzük, ta ashi.

NESO-isa high-level peace committee ka shimsü aser yangji kin ajunga nungi shimoka yimjung atema jembishinüa lenmang bushitsü ayongzük, ta ashi.



2021 küm Longsa yim dak ken-o ka adoka küm asem dak tali yim mesüngjemeti arur, 12th September, 2024 nü Longsa Baptist Arogo aser Longsa Laishir Telungjem-i ayongzüka Longsa yimden akhi ama lungjemer akangshia aotsü asoshi Longsa Baptist Arogo nung yimjung sarasadem sentong agidang tangokba noksa nung angur. Iba sentong nung Longsa laishir Dr. Zulu Jamir, Rev. Supongchiten, Rev. M. Toshi, Home Missionary Yanger parnoki tongti shilem agia liasü. Mokokchung, 12th September, 2024

Fazl Ali College nung workshop ka ayongzüka agi

Dimapur, Rongjui/September 12 (TYO): "Scouting, Documentation and Dissemination of local grassroots innovators from Nagaland" dak sendakba nung Fazl Ali College, Mokokchung nung September 11 nü workshop ka ayongzüka agiogo.

Iba workshop ya Department of Environmental Science, Fazl Ali College, Mokokchung & Research and Development Cell (RDC) FAC, Mokokchung aser (National Innovation Foundation) NIF-India na longjemer ayongzüka liasü.

Workshop lapokba sentong nung Scientist - National Coordinator, Scouting, Documentation and Data base Management Division, NIF-India, Autonomous Institutes, DST-Govt. of India Dr. Vivek Kumar-i, NIF-i grassroots

innovators tem aniteter aser tesendaktep yangluyonga aotsü atema tesem ka nung tensa angatetsü atema sensaksemstü kanga tongtibang ta ashi. Paisa, grassroot level nung jangjatetba innovator tem ajanga linük kübok tesem aika nung local tem ajangzükogo, ta ashi.

Mezüngbuba technical session ya Dr. P. Tiatemu, Asst. Prof. Department of Botany, FAC, Rapporteur, Dr. Shokip Tumtin Asst. Prof. Department of Chemistry na lenisüba nung agi aser HoD, Department of Environmental Science, Nagaland University Prof. Ashutosh Tripathi-i "Scope of locally available Bio waste in livelihood innovators opportunities" onük nung jembia liasü. Pai, Nagaland ya bio resources nung takar lir anungji iba ajanga jana nungi rongsen

kümdakstütedtsütsü, ta ashi.

Tanabuba technical session ya Dr. B. Imnawabang Longkumer Asst. Prof. department of Economic lenisüba nung agi aser Dr. Akumtoshi LKR, Entrepreneur Managing Director, Sutsung Enterprise Pvt. Ltd-i "Sharing of Innovative Entrepreneurship journey" onük nung ajemdaker jembia liasü. Technical session tembangba sülen local aluyimertem, innovators aser local healer tem den sensakem sentong ka agia liasü.

Iba workshop ya project Investigator, Nohochem Sangtam, Asst. Prof. Environmental Science Department tawabangba kübok Scouting and Documentation on grassroots innovators dak sendakba nung NIF den longjemer ayongzüka agiogo.

Centre dang Naga yimden ken o tematiba jenjang nung... (TAPAK 1 NUNGI...)

NSCN-IM aser WC NNPGs temi GoI den balala jembishinüa aruba indang jembidang, küm paika ya ka kuma lungjemtsü ajungshia aser mepishia aruba nung temelenshi kecha malibha yong tang nübur dangi 'directions' melener, ta pai ashi.

"Onoki iba tebilemstü nüburtem matsüngdangi bener arur...kechiaser kü paika ya asenok külemi ayongzüka aruka temelenshi mali aser tanep tashi parnok dangatetba balala nung nokdaka lir. Yamai dang maneni ora asenok tarutsü tia mali," ta Kenye-i ashi.

Anungji parnok lungjemtsü asoshi asenoki tatem maka atatsü asü mesüra asenoki iba atema mapang talangka indokogo, anungji tangbo nüburtemi parnok indang blue prints aser

documents shisadanga neutral level kati anir arutsü asoshi inyaktepsü ta ashi tajungba.

Nüburtem solution atema ataba lakogo aser parnoki iba ken o jembiba ya tatem nungbo parnok atema masü saka nüburtem atema ta shira, nüburtemia yangji o karbo ashitsü lir, ta Kenye-isa ashi.

Tanü iba senden nung stakeholders temi presentations balala agütsü aser shisatsü aika lemsatepogo, koba taruba senden mamandang PAC aser sorkari mapang agia shisadangtsü, ta pai ashi.

PAC-i Naga national groups tem ajurutsü na ta asüngdang dang, tanü ama shisadokden senden nung arok-i teletmetba ka agiba sülen inyaksü, ta pai langzü.

Iba senden nung State Assembly nung züngsem 60, MP ana, Political Consultative Committees züngsemtem, kin 15 - Angami, Ao, Chakhesang, Chang, Khamniungan, Konyak, Lotha, Phom, Pochury, Rengma, Sangtam, Sumi, Tikhir, Yimkhiong & Zeliang, parnok indang tetsür aser kaketshir tentet, Central Nagaland Tribes Council, Eastern Nagaland Peoples' Organisation, Tenyimi Union Nagaland, Naga Students' Federation, Eastern Nagaland Students' Federation, Global Naga Forum, Gaon Burahs Federation, Forum for Naga Reconciliation, Joint Christian Forum aser Naga Peoples' Movement for Human Rights den Gazetted Officers tentet tem nungi jaoka liasü.

GOVERNMENT OF NAGALAND OFFICE OF THE LABOUR COMMISSIONER New Capital Complex NAGALAND: KOHIMA

No.LBR/TECH/CSR-146/2023

Dated Kohima, the 11thSept' 2024.

CIRCULAR

Applications are hereby invited for students studying from Class IX to class XII in Government Schools across Nagaland for the academic year 2024-2025 for availing education scholarships up to Rupees 12,000/- annually per student (a reimbursement scholarship programme) under the Muskaan Scholarship, a Corporate Social Responsibility initiative of Valvoline Cummins Private Limited. The Muskaan Scholarship program is a reimbursement scholarship offered to the children of Commercial drivers, Mechanics and Economically Weaker Sections (EWS) families who have secured a minimum of 60% and above in the previous year's final exam.

For details and to apply for the Muskaan scholarship, eligible students may visit the link provided below: <http://muskaan.valvolinecummins.com/>


Sd/-
(Er. S. L. WATI AIER)
Labour Commissioner, Nagaland, Kohima.

OM Books



DIMAPUR

Christian Book Fair



9 - 21st SEPTEMBER 2024
9:30 AM - 5:30 PM
(Sunday Closed)

📍 O.M Books, A.H Road, opp. Dimapur Sumi Baptist Church, Chakhesang colony, Dimapur.
☎ 98620 08081



- 1950 /-**
1. Every day with Jesus - 299
 2. Quick Scripture Reference for Counseling - 249
 3. How to Read the Bible For all its worth - 249
 4. 101 Bible Lessons - 325
 5. Fire of Revival - 99
 6. Peace with God - 225
 7. Heart of Christian Leadership - 199
 8. Preparing Expository Sermons - 275
 9. New Evidence that Demands A Verdict - 949

2557, offer Price 1950/-

School Education-i metetdaksür

Dimapur, Rongjui/September 12 (TYO): State nung aliba Private School tem ajak indang record update asütsü aser streamline asütsü atema Department-i inyaka aliba nung shilem ka ama comprehensive data bendenba inyakyim ka ayongzüka agitsü.

School tem kanga junga asadanga atatsü aser nongita yaritsü atema osang tejangja bendenba ayutsü asoshi iba inyakyim ya benoker.

Iba dak sendakba nung Pre-school aser Private School ajak

dang data bendentsü atema Google Form agüja aliba fill up asütsü aser September 30, 2024 nü tashi nungbo benoktsü tetuyuba agütsüogo. Iba tetuyuba ya Board balala nung züngoksemer aliba School tem atema-a lir. Google Form atema link ya Department indang Official Website <https://education.nagaland.gov.in/> nung angutsü.

Data bendenba inyakyim dak sendakba nung osang tejangjaba agitsü atema iba number; 94852 76690 den tongtepratepsü mepeshia metetdaksüogo.

Mkg DC-i polling station draft list indang metetdaksü

Dimapur, Rongjui/September 12 (TYO): Deputy Commissioner & District Election Officer, Mokokchung, Thsuvisiephoji-i sangdong ka ajanga, Returning Officer's Handbook Chapter 11 Para 2.8 dak ajemdaker Mokokchung district kübok constituency 10 prongla atema polling station

tem indang draft list ka renemba sangdongogo. Iba draft list ya September 12 (Brehostibarnü) sangdongogo.

Draft list dak sendakba nung tashishiba, teshidangnüba mesüra temelenshi kar danga lira September 19 nü tashi nungbo ketdangsur nem agütsütsü metetdaksüogo.

GOVERNMENT OF NAGALAND DIRECTORATE OF HIGHER EDUCATION NAGALAND: KOHIMA

NO.HED/EXGS/NGESSO/2018/23 Kohima, dated the 12thSeptember 2024.

Nagaland Government Ex-Gratia Scheme for Students Studying Outside Nagaland (NGESSO)

The Department of Higher Education, Nagaland is implementing the Nagaland Government Ex-Gratia Scheme for Students Studying Outside Nagaland (NGESSO) which provides an Ex-Gratia of ₹5 Lakh in the event of any unfortunate deaths of Indigenous Naga Students of Nagaland who are studying outside the State in different parts of the country. In order to avail this Scheme, students have to register themselves with the Directorate of Higher Education, Nagaland.

For the academic year 2024-25, Registration Form (Fresh/Renewal) and necessary information are available on the Directorate's Website <https://highereducation.nagaland.gov.in> for download.

Last date for receiving Registration Form: 30th November 2024.

Sd/-
(V. LOVITOLY SEMA), NCS
Ex-Officio Director
Higher Education
Nagaland: Kohima



NAGALAND HEALTH PROTECTION SOCIETY

AB PM-JAY/CMHIS (GEN) nungi teyari angutsü pur kati shirang anepaluba nung sen endokra, iba sentong ajanga shirang anepalutsü atema endokba senji sen lakh 5 tashibo meyipa angutsü amai bilemba ta tai tangatetba ka lir.

AB PM-JAY/CMHIS (GEN) sentong ajanga küm nung kibong shia atema sen lakh 5 jenjang cashless health insurance agütsür. Iba sentong ajanga teyari angutsür purtem asoshi empanel süa aliba mozü kitem nung sen masü teyariang angutsü. Item teyariji item mozü kidangji teyari angutsür purtem dang shirangba mapang yariba sen kecha memeshitsü. Ajisüaka, mozü kitem nemjiang shiranger anepaluba nung endokba senji lateta akaba jenjang nung shiranger anepluba mapa yari meyipa agütsütsü. Iba sentong ajanga küm shia sen lakh 5 tashi nung teyari angutsü. Shiranger anepaluba nung iba sen dakji tali adokra, talila endokba senjibo teyari angutsür puri pei sen agütsütsüsa akümtsü.

Temetetsü : AB PM-JAY and CMHIS (General Category) sentong yagi mozü kidang general ward nung monga anepaludaktsür mesüra mozü kidang mamongyonga minor surgery, dialysis, aser chemo/radiation therapy agirtem nem dang teyari agütsür. IRDAI inyakyim nung aliba ama, iba sentong ajanga teyari aser osettem karbo magütsütetsüa akok. Itemji cosmetic procedures, lateta akaba jenjang dak tali indang takdang agiba aser high-end implants talila agütsüsa akümba amalatem asütsü.

Teyari nungdakra item helpline number mashi ka nung ajatsü mesüra WhatsApp ajanga tongteprateptsü akoktsü :
8880515011 | 8880515012 | 8880515013 | 8880515014

Arrshi küm 70 ser temapurtem atema Ayushman Bharat scheme atsülangtsür

New Delhi, September 12 (Agencies): Centre sorkari income category kecha mebandangi teintet sensotem ajak asoshi Ayushman Bharat health insurance scheme atsülangtsütsü lemtetogo.

Ayushman Bharat Pradhan Mantri Jan Arogya Yojana ajanga arrshi küm 70 ser temapurtem ajaki national insurance scheme benefits angutsü, ta sorkari metetdaktüsü.

Ato kilonser Narendra Modi leniba nung amenba Union Cabinet senden nung AB PM-JAY Scheme atemaji

telemtetba agi.

Sorkari sangdong ka ajanga, "Cabinet-i lemtetba ama income tebandang kecha makai arrshi küm 70 ser temapurtem ajak AB PM-JAY ajanga tajanzük angutsü temsüa lir. Temsüa alir teintet sensotem nem AB PM-JAY kübok card tasen kaka agütsütsü," ta metetdaktüsü.

Ato kilonser Modi-i ashiba agi, iba scheme ajanga kibong crore 4.5 aser teintet senso crore 6 tajanzük angutsü. Iba scheme kübok health care atema kibong sasep nung sen

lakh 5 shi jenjang tajanzük angutsü.

Private health insurance alir teintet sensotemia iba health insurance scheme atema tenüng agütsütsü akok, ta sorkari metetdaktüsü.

Public health insurance schemes ji Central Government Health Scheme (CGHS), Ex-Servicemen Contributory Health Scheme (ECHS) aser Ayushman Central Armed Police Force (CAPF) lir. Parnoki tang aliba scheme aser AB PM-JAY scheme na rongnung ka shimtsü akok.

Maldives Tir, Mohamed Muizzu-i India semdangtsü

New Delhi, September 12 (Agencies): Kobi melii Maldives Tir, Mohamed Muizzu-i India semdangtsü, ta pa indang otongdari metetdaktüsü.

Maldives ketdangserisa, taküm January ita nung India Ato kilonser Narendra Modi anema jembir minister asem anenja aliba nungi anabo-Mariyam Shiuna aser Malsha Shareef nabo Mongolbar menden nungi anenadokogo, ta metetdaktüsü.

Tir office nung tongti otongdar, Heena Waleed-i, Muizzu-i India semdangtsü anogoji tang tashi nungbo melemtet, ajisüaka linük anapronglai mapang tajungtiba apir anogo shimtsü, ta ashi.

Waleed-i, "Tiri kobi melii India semdangtsü. Iba atemaji o lemtepar," ta metetdaktüsü.

Muizzu Tir akümba mapang nungi India aser Maldives na tesendaktep mejungi aküm. Pai Tir tenangzükba agiba sülen ghonda ishika tsüngda pai India nung sepaitem aviation platform asem nungi agentsü takhangba agüja liasü. Linük ana tsüngda jembiba sülen India nung sepaitemji civilian agi melenogo.

Maldives nung deputy minister asemi social media ajanga India aser Ato kilonser Narendra Modi anema jembiba sülen India-i item oji kanga ashishia liasü. Ajisüaka Maldives Foreign Ministry-ibo minister temi jembiba otemji sorkar tangatetba masü, ta jangjashitsü.

Indian Ocean Region nung Maldives ya India atema kanga tongtibang kiyonger ka lir.

Taoba Tir Ibrahim Mohamed Solih-i aniba sorkar mapang nung India aser Maldives na defence aser security densema lenla aika nung tesendaktep kanga junga aküm. Ajisüaka China pusemer Muizzu Tir akümba sülen linük ana tesendaktep mejungi aküm.

Taküm June 6 nü Ato kilonser Narendra Modi tenangzükba agiba sentong nung adentsü atema Muizzu-i India semdanga liasü.

Taoba mapangtem nungbo Maldives Tir tasenpurtemi India tama semdanga liasü saka Muizzu-ibo Turkey aser China na tama semdang.

June ita nung Muizzu-i India semdangba sülen Indian External Affairs Minister S. Jaishankar-ia August ita nung Maldives semdangogo.

Office of the MOLUNGYIMSEN SENSO MUNG DANG P.O. Tuli, Mokochung : Nagaland

TENÜNGSANG AGÜTSÜR

1. Wb. Nukshi Jamir (IFS Retd.) aser Wt. Bendangla (Retd. Asso. Prof.) na jabaso **Sp. Namanir Jamir**-i Indian Audit and Accounts Department (IAAD) under CAG Comptroller and Auditor General of India nung Assistant Audit Officer mapa anguba atema tenüngsang agütsür.

2. Wb. Tia Sanglir aser Wt. Kikruzeu Solo na jala **Kr. Nuktangtila Sanglir**-i Life Insurance Corporation of India (LIC), Govt. of India undertaking nung Assistant Administrative Officer (AAO) mapa anguba atema tenüngsang agütsür.

Molungyimsen asoshi konang nüngsang tulu bentsür aruba atema nuna dang kanga pelar aser nuna atanger aser sorkar tenzükba wadang nung maneni Tsüngremi nuna moaja len aniang ta sensosangeri sarasademtsür.

Sd/-
N. Joseph Lemtur
President

Sd/-
B. Imsuinba Jamir
Secretary

CPI(M) General Secretary

Sitaram Yechury alima nungi pilaogo

New Delhi, Rongjui/September 12 (Agencies): CPI(M) lenir, Sitaram Yechury mapang talangka shiranga aruba sülen Brihostibarnü alima nungi pilaogo; pa arrshi küm 72 liasü.

CPI(M)-i X ajanga, "Onoki meima alisang Sitaram Yechury, General Secretary of CPI(M) tanü AIIMS nung monga lia alima nungi pilaogo. Külem tenzükür Sitaram Yechury nem onoki akhüm agütsür!" ta metetdaktüsü.

Party-isa, Sitaram Yechury agütsü atema AIIMS nem tenla agütsütsü, ta metetdaktüsü.

CPM general secretary, Yechury temang mejungi akümba sülen taoba ita (August 19) New Delhi nung aliba All India Institute of Medical Sciences (AIIMS)-i anir oa treatment tagidak liasü.

Pa AIIMS nung aliba Intensive Care Unit (ICU) nung acute respiratory tract infection atema treatment tagidak liasü.

Sitaram Yechury ya 1952 küm August 12 nü Chennai nung aso aser pa ya India nung yimtenren nung kanga tongti lenir ka liasü. 2015 küm nungi tenzükba pa CPI(M) nung General Secretary inyaka aruogo.

Pa Hyderabad aser Delhi nung college azüngba mapang nung pai yimtenren nung ajemoka liasü. Pai kaketshirtem sentong aika nung shilem agia aruogo. Talisa Jawaharlal Nehru University (JNU) nung azüngdang pa Students' Federation of India (SFI) nunga lenir liasü.

Yechury-i küm 12 tashi Rajya Sabha MP inyak (2005 nungi 2017 küm tashi). 2015

küm April 15 nü Vishakapatnam nung 21buba party congress alidang pa CPI(M) General Secretary shim. Iba mapang nungji pai Prakash Karat melenzüka liasü. Opposition INDIA teloktep nunga pai tongti shilem agia aruogo.

Pa asüba osang angashia Ato kilonser Narendra Modi-i X ajanga, "Sitaram Yechury alima nungi pilaba osang angashia jashir. Pa ya Left atema tesangwa sayur ka liasü aser yimtenren nung pai ajak den sendaktepteta liasü. Pai Parliamentarian ka ama shilem tajung agi. Ni par kibong züngsemtem aser par medemertem atema sarasademtsür," ta lemsatet.

Congress lenir Rahul Gandhi-i X ajanga, "Sitaram Yechury ya medemer ka liasü. India tangatetba kümzükür ka aser pai asen linük kanga junga angateta liasü. Küna mapang talanglang o lemtepa ni mamatoktettsü. Tang ama tejashi mapang nung par kibong züngsemtem, medemertem aser pa pusemer ajak den ni mangyim jashi lemsateper," ta metetdaktüsü.

Congress lenir Jairam Ramesh-i, "Yechury ya nisung tajung ka liasü, oshi balala jembiteter ka aser kaket meimer ka liasü. Pa ya CPI(M) indang tongshi ka liasü aser asayamenü sempet aketba Parliamentarian ka liasü," ta metetdaktüsü.

"Onoki pa den küm 30 dak tema inyaksema aruogo aser aiben amalitepa inyakogo. Yimtenren nung pa medemer aika liasü aser pa dak tangatetba tajung aliba atema aikati pa nükshi," ta Ramesh-isa metetdaktüsü.

Maharashtra nung MVA-i menden 180 dak tema angutsü: Balasaheb Thorat

Mumbai, September 12 (Agencies): Brihostibarnü Congress lenir, Balasaheb Thorat-i, Maharashtra assembly election nung Maha Vikas Aghadi (MVA) teloktepi menden 288 nungi menden 180 dak tema nung takok angutsü, ta metetdaktüsü.

260 shi pilar aliba Ahmednagar nung osangbenertem den jembidang Congress Legislature Party (CLP) lenir, Thorat-i, MVA teloktep nung aliba party temi telemtetba agiogo, ta metetdaktüsü.

MVA teloktep nung aliba party asem- Congress, Shiv Sena (UBT) aser NCP

(Sharadchandra Pawar)-i menden 125 atemabo telemtetba agiogo aser tanüngba menden atema tang tejembidak lir, ta paisa metetdaktüsü.

Taküm October-November nung Maharashtra nung assembly election agütsü.



September 12, 2024 nü Samba district nung Uttarakhand Chief Minister, Pushkar Singh Dhami, BJP National General Secretary, Tarun Chugh aser party candidate, Surjit Singh Slathia (ajichi) nungeri Jammu and Kashmir Assembly elections atema nüboyindang tangokba noksa nung angur.



TIR YIMYIM YIMOBILEM (EDITORIAL)

DIMAPUR ROGONÜ, SEPTEMBER (RONGJUI) 13, 2024

ILP ya kechi atema ?

Asenok Nagaland nung alir Naga nunger lisopurtem tia ajung, asenok shiruru ama zülua mashi aser azüngtsüa memetet, anogo azüngtsüa yong dang süka aliba putu mapang 1873 küm, India nung British nungertemi yimsü asüdang parnok bendanger shinga parnok dang nungi temelaba magii Naga nunger aliba lushi nung tetsüng majemoktsü aser tenemleni matutsü ozüng tasen ka latettsü. Iba ozüng dangji 'Bengal Eastern Frontier Regulation, 1873'(BEFR) ta aja. Ashiko, parnok nükjidongjibo Naga nunger kümzüksüba masü saka parnok kijai Naga nunger amokbangtsü nükjidong liasü alitsüa akok, mesüra Naga nungertemji lendong nisung asünungji lendong nungi kümzüksü asoshi nokdangba asütsüa akok. Atangji, angazükba agi British nungertemi Naga nungertem ya parnok mesüka tajung mekümdaktsünü, anungji alemli parnok mapang Naga nunger kaketshidaki aoer tanurtema half pant , long pant aser tula asemtsüa memela aser ku-a parnok ama masü Ao kubangtsüng ta atsüngtsü mela. Iba amaji British nungertemi Naga nungertem ya alima nung nisung tapu balaka wazüka yur mesür ama ayutsü tebilemba liasü südi. Ano, tajung tsütsüa British nungertemi dang asenok yim o yim na aser kin o kin na lepteptungtepa aliba anendaktsü aser teti atema yimjung yanglutsü. Aji oda, koba tebilemba, tangatetba aser nükjidong nung 1873 küm British yimteni Naga nunger masüba kin aser nisung shinga temelaba magii Naga nunger lushi nung tetsüng majemoktsü ozüng latetar asenoki ashitsü makok, saka tanübo asenok asoshi iba ozüng ya asen li aser asen sobaliba aser rongsen kümzükter ka kümogo. Atangji, 1873 nung latetba ILP ozüng BEFR ya Naga nunger asoshi Tsüngremi latetdaktsüba temoatsü ozüng ka liasü ta tanüang tajungba angateter. Ajisüaka, tesasatsüka kaji, tangaribo asenok ajangzüksüsa ozüng tajung aser takang lateta yutsür, asenokiang junga mamshitet aser mebenshitetba ajanga lenden lima Dimapur, Chümoukedima aser Niuland district-tem nung dang masü saka Nagaland ajaklen Nagaland nung lisopur masüba nebo, talisa, tzümartem senoka aitdaktsüogo aser tanübo Naga nunger rongsen ajak parnok ket nung dang lir. Iba jagi asenok Naga nunger tanurtem tazüngi yokdanga tzümartem dang sen apur yoker, kibong akümdanga tzümartem dang sen apur aser election nung sen amshiba sen ajak ya tzümar ket nung akaba asenok sen parnok dang apua amshir. Aji oda, anogo ishika amongtsü asoashia temelaba agir dang Nagaland-i arutsüsa ozüng takang lateta lir ser nung, tzümartem ILP amer pei semchir semnur arua tashi , asen oshia asen dang nungibo parnokiang tajungba jembiteta Nagaland town ajak nung lidaktsür. Itemji ILP (BEFR) ozüng raksartem lir. 1873 nung British nungertemi latettsüba ozüng ya nungdak asüba agi, küm 87 sülana 1960 küm Nagaland state akümtsü atema India government den ken o 16 renem danga, iba kasa ozüng ya shitak bentshia aotsü latet. Joko, iba ozüng ya Nagaland dang nungibo Arunachal, Mizoram aser Manipur state-tem nungang tajungba bentshia odagi aser Meghalaya nunga kaketshirtemi ILP ozüng latettsü akanger. Aji oda, asenoka menur süaka ano ken ILP ozüng ya akangshia amshitsü atema kaketshirtemi state government dang akangba ama, tang nungibo ILP mamshii aruba district Dimapur, Chümoukedima aser Niuland district-tem nunga ILP amshitsü telemtetba agibaji Naga nunger lanurtem asoshi osang tajung ka asütsü. Atangji, lemtetaka, talisa Dimapur aser Niuland district ama nungbo tang ajungbena ILP amshi tenzüksübjaji tasak asütsü, kechiyong gari, tayimtsü aser train arulen dang masü saka Assam len nungi Nagaland-i arutsüba lenmangji ajaklen lapoka dang lir, anungji itemji anüktsü aser mittsü atema sentong renematsüla. Ibaji dang masü saka item district nung alirtema tzümartem aika Nagaland lisopurtem lir, parnokjibo ILP menüngdaktsü, anungji itemji bendangtetsüsa inyakyim ka tama renematsüla. Item ajakji government-i inyaka odar asütsü imlar. Iba kasa mapang nung tanga district-tem nunga ILP amer kümsa kumbo melidaktsütsüsa, BEFR ozüng indang ken o benoka shisalemsateptsüla aser ozüng shitak amshitettsüsa mapa tenzüksüla.

OLEMSABANG

YI, YIJEMER, YIYOKER, YIOZÜNG

~ T. Meren Paul, Lower PR Hill, Kohima

(Yashi adok nungi...)

NLTP Act, 1989 nung ya lokdi (general public) asoshi yi tenokdangba- yi mayoktsü, bener marutsü aser majemtsü tenokdangba ozüng den teyepelen nungi teshimtet pur bo Yi ayoktsü, ajemtsü aser yijok/yi zü yanglutsübo permit agutsütsü leman sadema lapoka lir. Anungji tang aliba NLTP Act, 1989 ya total prohibition masü partial prohibition ta nibo angateter. Ano Section 84 nung kin eshikati ajemba 'Zu' aser "Rohi' yanglua ajemtsü tenokdangba nung madentsü tejangja zülua lir.

Alcohol, Ao nung Yi ta dang shidi, ya tapu asem lir, Ethyl Alcohol, Ethanol Alcohol, Methyl Alcohol saka nisung ajemtsü yi temerak tajung yangluba yabo Ethyl Alcohol nungi dang yanglur. NLTP Act, 1989 nungji yi meyanglutsü tenokdangba aguja lir, saka, Ethanol aser Methyl Alcohol (denatured Spirit), ni yangi iba dangji Yi-zü aser Yi-jok ta shidi, edemji yanglutsübo permit agutsür anungji edem Yi-zü, Yi-jok amshia yi tamajungji yanglua ayoker koba asenoki spurious liquor ta jempir.

Alcohol nungi tajemtsü yi yangluba ya maparen ana amshia yanglur, Rum, Whiskey, Brandy. Gin ya Distillery nung mulua adokdaktsür saka beer yabo Brewery nung piazü enoker süngjanglijang shirebdakja tetzü senzüka yi asaher (fermentation) Yi ya aika mesepa ajemba agi temesepba yi ta ajar saka na temang asoshi tadakzük jemra aser ibajagi memesepba na asoshibo ibaji temesepba yi masü saka temang asoshi mozü. Yi aser Sen na ya amshiyim nung mesüktepa lir. Sen ji temenen masü, sen agidang taküm alir, saka kodang senji azüaponga tali meimdir idangji temenen adokdaktsür. Asenoki aiben senji temenen ajak tera (root) ta jembir saka laishibaibo (I Timothy 6:10) sen meimjbaji dang temenen tera ta ashir. Yamaji yijia nungdakba mozü tajung agi temenen kuma odaktsür aser ibaji asenoki mazüoktetba agi. Tangarlima nungbo Dokan shishir dem ya social service tulu inyaker ta züngshir aser parnok shishilempabaji ozüngi melaba ama inyaker. Ni 1992 küm UK nung study karh agia liasü aser onok London nung aliba mapang onok Hotel anasaji Indian nunger dokan ka ajuru. Ni aiben nükongdang azünga alidang India nungba denjemener otsü adonga sa kazü. Aiben asangur chanu dokani arurdem jagi Cigarette aser beer alitsü meshia arudang dokan kibur jagi age proof aser permit sa meshi kechiyong küm 18 tekü pok dang Yi aser moko mayoktsü ozüng lir.

Yi ya anepdang pulua ajemba chiyongtsü ka masü saka tongtipangsa aonung chiyongtsü jakdang chi pangnangtsü (appetizer) marok ka mesüra ana ajemer aser pangnang pangnanga chiyonger aoer. Asenokbo bottle azünga yi jagi memesep tashi ajemer aser aonung chi tuluka chiyonger kidangi aotsü melen anepdang chiyongba tua saksüdoka endoker kidangi aor. Mangatet, memetet ser tangar ajemerah ta ser jilu ajia jemra yamaji tamashi mapa inyaktsü. Yi yagi kodaser meseptsüsa akumer? Yi kodang aika jemdir yi jagi asenok tokolok anü anüa kümdaktsür aser tokolok nungi tezütera ajanga temang tenüktelen arkazüdaktsübaren lulaa odaktsür. Asen temang nung yi alibaji enzyme alcohol dehydrogenase yaki yiji liwadakja lusaa acetaldehyde kümdaktsür aser maneni acetaldehyde ji acetic acid kümdaktsür aji oda asen temang nung alcoholji liwadaktsür. Saka kodang yimya agi lusaaodaktsütsüakokba tashi alemteta teyimba jemdir yi jagi tokolok tepezü kümdaktsür ibajagi tenüktelen ajak tashi ita marakzüteti nepdaka ayur. Mapang shia yijemer kari aniba accident ajuruba asenoki osang kaket nung züngshir. Yi yagi temang nung tekeraba action agibaji tokolok nung tangshir.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Singapore nung Pope-i leniba tekülem sentong nung nisung 50,000 aden



September 12, 2024 nü Singapore nung aliba National Stadium nung Pope Francis (tesülen mena alisang) leniba nung tekülem sentong agidang tangokba noksa nung angur. Kasa noksa nung Archbishop of Singapore, Cardinal William Goh (tejaklen) angur.

Singapore, Rongjui/ September 12 (Agencies): Brihostibarnü Pope Francis-i Singapore nung yimtenren lenirtem aser yimsü lenirtem dang linük nung bendanger aayanger/mapa inyakterem nem taa shidak agüjang, ta ayongzük. Pope Francis-i Southeast Asia aser Oceania nung anogo 12 linük pezü semdangtsü apusoba sülen tang tesüsa Singapore semdangrer.

Singapore nung bendanglen nungi arua mapa inyaker nisung million aika lir aser parnok teimbaka kisüjensüba mapa aser industry balala nung inyaker.

Parnok ama mapa inyakterem nem taa ajemer agütsüba atema tebilemstü kaja arrshi küm 87 Pope Francis-i, "Sensakertem aser teintet rogotem atema inyaksü aser bendanglen nungi arua mapa inyakterem akhümket kümzüksü, ta ni amanger," ta metetdaksü.

Yimtenren lenirtem aser yimsü lenirtem 1,000 shi den jembidang pai, "Item ama mapa inyakteremi loktiliba atema shilem tulu agir, anungji parnok nem taa shidak agütsütsüla," ta ayongzük.

Singapore nung mapa

inyaksü permit alir bendanger million 1.1-ibo ita shia dollar sen 2,300 dang nungi tajemba angur, aser iba nungji ki mapa inyaker 286,300 lir aser kisüjensüba mapa, rong yangludak aser industry nung inyaker 441,100 densema lir.

Item ama mapa inyakteremji teimbaka Malaysia, China, Bangladesh aser India ana anasa aliba linüktem nungi arurtem lir.

Pope Francis-i Singapore Tir, Tharman Shanmugaratnam aser Ato kilonser, Lawrence Wong na den senden amenba sülen pai yimtenren aser yimsü lenirtem ajurua liasü.

1986 küm mezüng Poe John Paul II-i Singapore semdanga liasü.

Singapore nung nütsüng million 5.92 lir saka Catholic Khristantembo 210,000 dang lir.

Singapore nung aliba national sports stadium nung Pope Francis leniba nung tekülem sentong ka agi, aser iba sentong nungji nisung 50,000 shi aden.

Pope Francis-i Indonesia, Papua New Guinea aser East Timor linüktem semdangba sülen tang tesüsa Singapore semdangrer. Hokolbarnü pa Rome-i meyipa aotsü.

Bodhbarnü Pope Francis

Singapore tonga arua liasü.

Singapore ya 1965 küm nüchiso ngua liasü aser iba linük ya Asia nung industry aser technology tsütsü kanga tejakleni aoba linük ka lir. Iba linük nung nütsüng teimbaka China nung nungi jakzükba lir. Singapore nung nütsüng shilem 19 Khristantem lir.

Archbishop Justin Welby-i Palestine nunger Khristan lenirtem ajuru

September 12, 2024: London nung aliba Lambeth Palace nung Archbishop, Justin Welby-i meimchir temeden atema inyaker lawyer, Dalia Qumsieh aser meimchir temeden atema inyaker, Mays Nassar na ajurua senden amen.

Pastor Rev. Dr Munther Isaac-a video link ka ajanga iba senden nungji aden. Jordan aser West Bank na tsüngda Allenby apu shibanga aliba ajanga Pastor Issac iba senden nung adentsü atema UK-i maruteti liasü.

Senden nungji Palestine lenirtemi Archbishop Justin nem Gaza nung rara aser West Bank nung tensa tamajungba akümba osangtem metetdakja liasü. Bethlehem aser Jenin ama yimitem nung Palestine nunger Khristantem kanga timtemdar.

Archbishop Justin-ia Khristantem densema Palestine

ANOGO ABEN TSÜNGREM DEN

Tashi tait mulung süngzükdak

"Aser temulung dangi aitba aser pei sasa Tsüngrem metetba anema ulutsüba tematiba kechisarena onoki laodaktsür" (2 Kor. 10:5).

Ne temulung nung raraba yimya 2 Korint 10:3-5 nung tejangja ashir: "Kechiyong onoki shi nung jajaaka, shi amato merarar....."

Mezüngbuba, iba rara nisung kolok aser shisatsü aser tashi agi merarar ta nai metettsüla. Nai ne sasa agi mesüra shi agi tamajungba madak takok angutsü makok. Ne nok-o-nüji Tsüngrem nungi aruba asütsüla. Tsüngrem nungi anguba mesüra nai takok mangutsü.

Tongtibang nükjidongji temulungjang jenokdak takümüji raksatsütsübaji lir. Temulung nung tajung bilema aliba tamajung agi melendaktsübaji jenokdak raksatsübaji lir. Ano tamajung bilema aliba tajung agi melentsübajia jenokdak raksatsüba lir. Ibai taküm nung temelenshi adokba ajanga metettsü akok.

Tebilemba jagi taliba yimya lemteter, aser jakla atongteter. Khrista memesükba jakla aser yimya nung tashi mait mitsaji jungkai adoktsür. Mesüngjem mulungjang koba nung teimla maka iba mulung jagi Tsüngremi mulungba den mesütepi mapa agizüker aser teraksa dangi odaktsür.

nunger meyirjang aika Israel nunger sepaitem indang tepuokdak aliba atema tebilemstü katsüba lemsatep.

Justin den Palestine Khristan lenirtemisa, Israel nunger süaka Palestine nunger süaka meimchir taküm ajakji kanga senti, ta bangjema liasü.

Palestine lenirtemisa aonung Lambeth Palace nung aliba Crypt Chapel nung Archbishop Justin den külemi sarasadema liasü. Archbishop-i Palestine nunger lenirtem, Palestine nungertem aser region nung aliba nübur ajak asoshi sarasademtsüogo.

Tesülen Archbishop-i, "Tanü Palestine nungi asen adianu Khristantem kar ajurutsü maongka ngua sarasademogo. Bendangertemi atsünga liaka, bendangshidanga züngshiaka aser rara liaka parnok tashi itta aliba atema ni Tsüngrem nem tenüngsang agütsür. Khrista aliba tesem, asüba tesem aser tasü nungi shia aruba lima nung parnok tamang jenjang matsüngshii aliba atema ni Tsüngrem dang pelar. Tanü ni angashiba osangtem angashia ni jashir aser Tsüngrem dang Gaza nung rara anentsü atema sarasademtsür," ta metetdaksü.

"Anogo shia Gaza nung nüburtem atema ni sarasademtsür aser asenoki Khristantem densema parnok ajak atema sarasademtsütsü aser Anglican Arogoi ketdangsuba Ahli Hospital atema sarasademtsütsü ni ayongzüker. Iba dak alia West Bank nunga Khristantem densema Palestine nungertemi

timtem kanga ajangshidar. Item ajak ya anenadoktsüla," ta paisa metetdaksü.

"Temeshi lima nung meimchir ajak takümüji senti. Takoksa jenti anguba aser maneni timtema mangyimba Palestine aser Israel nunger kibongtem den ni mangyimer. Rara anentsü atema ni maneni ayongzüker, pua alirtem ajak chioktsü aser Gaza nung timtemertem nem teyari agütsüba menokdangtsü ni mepishir. Gaza nung tai maketerem tepsetba aser teraksatsübaji ajanga yimjung bener marutsü. Temeshi lima nung nisung ajakji senti ta züngshia akhümstübuba ajanga dang yimjung arutsü," ta pai metetdaksü.

"Israel-i ozüng alema Palestine nunger li atsünga agiba anentsüla aser alima linüktemia Palestine nunger temeden pusemstüla. Temeshi lima nung ochi temeden, security aser teti atema yimjung alitsü asoshi sarasademjang," ta paisa ayongzük.

Archbishop Justin-i mapang shia Palestine nunger Khristan lenirtem ajurua senden amenba den külemi sarasadema arudar. Pai Ramallah nung aliba St Andrew's Anglican Church nung putir Fadi Diab aser Gaza City nung Holy Family Catholic Parish nung putir, Gabriel Romanelli na densema Palestine nunger Khristan lenirtem aika ajuruogo.

Taküm March ita nung Justin-i video link ka ajanga Pastor Munther Isaac den-a jembiego.



September 9 nungi September 11 tashi Old Showuba Ao Baptist fellowship nung Mother School Dimapur Ao Baptist Arogo (DABA) Women ministry-i achaayanga kanga temoatsü ngua agütsüogo. Fellowship sanger-i DABA dang kanga pelar. Tetsütemi koba temoatsü nguogo; kodak matong tashi iba temoatsü nung otettsü ajaki sarasademjangma, ta OSABF pastor, M. Yanger Ozüküm-i sangdong ka ajanga lemsatep.

AO OSHI ANGAZÜKDAK:

TANÜ ANGAZÜKTSÜBA OJANG



Tanang

(adj) tachitsü mojitzü ama tajung (sweet)

* Chiyongtsü tanang kangabo machitsüla.

Tanang

(n) tsüchir dak alepsang tanabuba

(second person amongst killers of an enemy)

* Tsükchir dak mezüng alepsang dang noksü aser tanabuba alepsang dang tanang ta ajar.

OLONG PAITEP # 6922

1 2 3 4 5 6 7 8 9 10 11 12 13 14 16 17

TIPIEN

- 1. Nisung jenti - (5)
4. Tsük rudenba - (5)
6. Temzüng tesashi - (5)
8. S ___ i - (3)
9. Nisung telemsa - (3)
10. Anogoshi - (4)
12. Ajanga aor - (4)
13. Tsük rizüngdak - (3)
14. Tebang nungi adokba - (3)
16. Süngdong tatembangtiba - (5)
17. Meputep - (5)

LANGTSÜNGLEN

- 1. Tenük telong - (9)
2. Committee dang ajar - (5)
3. Yagi ki okdoker - (7)
5. Yim lenmang - (5)
7. Temoatsü keter meyipa aruba - (9)
11. Kanga junga menemba - (7)
12. Majinü - (5)
13. Tzüma nung senzüba - (5)

OLONG PAITEP # 6921 TELANGZÜBA

TIPIEN :

- 2. Bangsemo, 6. Tiptem,
8. Jen, 9. Talila, 11. Aren,
12. Tzübo, 14. Alia, 16. Angati,
17. Odi, 18. Azü, 19. Sünglang.

LANGTSÜNGLEN :

- 1. Yipten, 3. Nüja, 4. Sangro,
5. Milen, 7. Tulu, 10. Laza,
11. Aben, 12. Tiyong,
13. Ajizük, 14. Aitsü, 15.
Tasa, 16. Aina.

Assam nung ano senotsü tsütatepba ken o nung tetsür ka puogo



Mainao Brahma

Guwahati, Rongjui/ September 12 (Agencies): Ozüing alema trading scheme ka tenzüka inyaksangshiba atema police-i ano Guwahati kübok LGBI Airport nung tetsür ka puogo.

Tetsür la ya Assam kübok Baksa district nung alir Mainao Brahma ta jangjaogo aser la ya New Delhi nungi Guwahati tonga aruba sülen apu.

Iba ochi mashi inyakyim ya temai adokba sülen la New Delhi nung atsüka liasü, ta osang ajanga metetdaksü.

Osang ajanga ashiba agi, lai investor tem aika ashiochtsü, shirnok timba yimdak yimtsüngtem nungi liasü. Investor temi sen intokba mapang shitak nung meyipa agütsütsü tenangzüka agütsür lai parnok ashiochkja liasü.

Senotsü takoksa ajangshirtemi ashiba agi, parnoki Brahma nem sen aika agütsüogo, shibai item sentem ya shishilembatsü atema amshitsü ta tenangzüka agüja liasü. Ajisiüaka sen agütsürtemi parnok sen meyipa meshiba mapang Brahma-i shishilemba nung takoksa ajuruba kuli agütsü aser parnok indang sen meyipa agütsütsü nongnangba sülen samatok.

Iba inyakyim nung takoksa ajurur aikati Mushalpur police nem tashishiba agütsüba sülen iba ken o ya temai adoka liasü. Parnoki Brahma aser la kinungbo, Samin Swargiary na aija liasü.

Meghalaya: VPP-i ILP tongtibangsa akhangtsü nangzük

Guwahati, Rpngjui/ September 12 (Agencies):

Voice of the People Party (VPP)-i, parnok tinyaktsü aliba mapatema asadangshitsü aser Meghalaya nung Inner Line Permit (ILP) system benoktsüba onük dak tongtibangsang rangloker inyaktsü ta metetdaksüogo.

Shillong MP Ricky AJ Syngkon-i, party-i tanga onük 24 den külemi tongtibangsa ILP ken o ya benoktsü ta tenangzüka agütsü, ajisiüaka koba mapang tashi nung benoka inyaktsü iba indang osang tejangja magütsü.

Khasi Students' Union (KSU)-i sorkar dang ILP benoka parnoki dang iba ken o ya achaayangtsü ta tekümdangtsü metetdaksüba sülen tang VPP-i iba tenangzüka agütsüogo. Ken o dak sendakba nung Centre aser state napronglai jenjang tapet magir ta shia Khasi Students' Union-i sorkar amokmerena liasü.

KSU-isa, state nung aliba local indigenous loktitem nungi teyari meshitsü aser state kübok tesem balala nung ozüing alema state-i senoka aiteretem anema jenjang agütsü, ta tenangzüka agütsüogo. Temetetsü kaji Meghalaya nung ILP benoktsü atema mapang talangka nungi nüburtemi takhangba agüja arudar aser iba den sorkari takokba tashi jenjang agidar, ajisiüaka tang tashi iyakyim takok monguteti lir. Kasa mapang nung iba onük ya political party aika indang yimden yimsütsüba tsütsü onük ka kümogo.

Küm tem tsüingda ILP benoktsü khanga state kübok tesem balala nung lokti tentet balalai longkak aita arudar, ajisiüaka tang tashi mebenoktetei arudar.

Meghalaya ya Bangladesh den arrtsü nung aliba state ka lir, anungji ozüing tapet mebenokra state nung lisopurtem tangari amokbangatoktsü ta aikati tsüba bilemba ajanga ILP benoktsü nongshia arudar.

MENUNGRA BILEMTETTER



13.09.2023 - 13.09.2024 Asür JONGPONGCHIBA

Kodanga amatsü makokba Oba & Kinungbu, tanü na meliaka onoki "Na tasütait aser temeim yimyatem menungra bilemteter. Na maliba ajanga onok kanga rongjener."

~ Temeim Kinungtsü & Jalatem.

Mizoram: Nüburtem sen laluba atema Congress-i ZPM sorkar aitsü



nangzükogo, kong chief minister, cabinet minister aser MLA tem indang gari densema lir aser yimjak nung minister aser MLA tem atema gari tasen malitsü ta sangdongogo," ta pai ashi.

Lanur lenir yagisa, state senotsü tali intokba ajemdaktsütsü atema jenjang agütsü nangzükaka parnoki nüngdak makaba nung senotsü intoker, ta ashi.

"Jenjang tapet agütsü nangzükaka sorkari lenmang aisü nung nüburtem indang sen intoker. Pa amshitsü atema gari pongu liaka chief minister-i tanga ketdangsurtem indang garia dena amshir," ta pai ashi.

Pai ashiba agi, tawa sen lakh 51 alang luxury gari asem alizükogo, koba chief minister indang escort gari ama amshitsü asoshi aliba lir.

"Assembly Speaker indang official quarter yanglushiba aser pa amshitsü atema gari ka aliba nung sen kasa intokogo," ta pai ashi.

Maneni Laltawnliana-i, Home Minister K. Sapdanga, densema minister 10-i parnok nem lemzüksüba sorkar ki magi, aser parnok jurila ki yanglushiba nung sen crore ka dak tema lalushipongogo, ta ashi.

Guwahati, Rongjui/ September 12 (Agencies):

Nüngdak makaba nung nüburtem indang sen intokba atema Mizoram nung Opposition Congress party-i Bodhbarnü, Lalduhoma-i aniba Zoram People's Movement (ZPM) sorkar aitsüogo.

State yimtiba Aizawl nung osangbenertem den sensaksemba mapang Congress party youth wing tir Laltawnliana-i, ruling party-i state rongsenketzüng jenjang tajungba küma yanglushitsütsü atema jenjang tapet benoka inyaktsü nangzükba ama minyaker ta ashi.

Paisa, taoba küm December ita sorkar kümtetba sülen Chief Minister Lalduhoma-i, fiscal 2024-25 ya state rongsenketzüng jenjang tamendakdak yanglushitsü atema 'year of consolidation' ta sangdonga liasü, ta ashi.

"ZMP-i, sorkar entitlements tajemba kümdaktsütsü

GOVERNMENT OF NAGALAND DIRECTORATE OF TECHNICAL EDUCATION NAGALAND: KOHIMA

Dt. Kohima, the 12th Sept., '2024

NOTIFICATION

The interested candidates of NEET - (UG), 2024 are informed that Vide RIMS, Imphal letter No.ACADEM/ADMN/UG/1/2024-AcademicSection dated 3rd September, 2024, applications are invited for admission into MBBS course during Academic Session 2024-25 for the following seats:

- (i) EWS (Economically Weaker Section) - 11 seats
(ii) Open North East (NE) - 10 seats

The last date of submission of filled-in applications to the Dean's Office is September 21st, 2024 upto 4:30 PM. Scan copies of the filled-in applications along with the required testimonials may also be sent by e-mail to - "admissions.rims.imphal@gmail.com" on or before the dateline given above. Counseling is fixed tentatively on September 28th, 2024 starting from 10:30 AM.

The selection of the candidates shall be purely on the basis of merit (rank) in NEET-UG-2024

The following documents are required along with the application:

- 1. Domicile certificate/PRC (not the Temporary Residency Certificate)
2. Admit Card of NEET-UG Exam 2024
3. Score Card of NEET-UG Exam 2024
4. Age Proof Certificate
5. Pass Certificate of Class X and Class XII
6. Mark sheet of class XII
7. EWS certificate issued by the competent authority of the State from where the domicile certificate has been issued (for those candidates applying under EWS Category)
8. Passport photograph.

N.B: Candidates are advised to check the RIMS website (www.rims.edu.in) periodically for any update. A link for submitting the filled in Application Forms may become live in a few days on the Institute's portal.

(ER. VIPULHOU LHOUNGU) Director.

Biden-i 9/11 nung telungjem temaitsü Trump campaign korang asem



Washington, Rongjui/Sept. 12 (Agencies): 9/11 lendong ataloker kum 23 ajungba biletmetba mapang US Tir Joe Biden-i taoba US tir Donald Trump indang nübuyimer temi asema korang temerem khen sema liasü.

Anü nung lia hijack asüba tayimtsü pezü rongnung ka Pennsylvania nung tzükokba anasa pai firefighter tem semdangba mapang iba ya atalok, aser pai iba korang ya telungjem temaitsü asem ta White House-i ashi.

Iba tatalokba indang video prokshib nung Biden-i Trump bhukumer ka den sensaksema liasü aser iba sülen korang melentep.

Donald Trump indang campaign-i yangji temenüntsü ajiteta Biden-i Republican korang semer aliba noksa ka nung "Yariba atema kanga

pelar, Joe!" ta zülur prokshia liasü.

Ano nisung kati, "Yasüng o intepba nung Kamala-i kanga mejungi shilem agiba ajanga Joe Biden-i Trump korang asem," ta zülüja liasü.

2001 kum kiralongrar temi hijack asüba Flight 93 biletmeta Shanksville nung sentong agia liasü.

Iba tayimtsü nung mena alir temi rara aser al-Qaeda teloki iba tayimtsü ya Washington, DC nung sorkar ki ka nung tsükoktsü sentong aliba nokdangteta liasü. Tayimtsü nung mena alir nisung 40 prong asü.

Biden-i firefifhter den ajurtepa fuselage teraksa agi yanglua aliba kangki ka nung akhum agüja liasü.

Station mezüngbuba nung tangokba video ka nung Biden ya nüburtem den jembia aser

"Trump 2024" ta zülua aliba korang semer alir nisung ka den sensaksema liasü.

Biden-i iba nisungba nem presidential seal aliba korang ka agütsü aser yangji pai meyongnem agütsütsü ta shia liasü.

Pa arishi kum indang khen asayamenüba sülen Biden-i iba nisungba nem pai meyongnem agüja aliba korang ya agütsü aser Trump indang korang den melenteptsü ashi.

Iba tesem nung sentepa alir kari pa dang korangji asemstü ashi aser iba mapang pai "Ni aji tashibo meinyaktsü!" ta ayimoktsür korangji semlok.

Mapang tatsüka lir White House-i social media sangdong ka nung iba yagi anogo indang omen, telungjem indang sayuba yimya ka lir ta ashi.

"Temaitsü sayua pai Trump bhusemer ka nem korang ka agütsü aser iba nisungba yagi tangatetba kasa nung POTUS dang Trump indang korang asem ashi," ta deputy Press Secretary Andrew Bates-i social media sapang X nung ashi.

O intepba indang asayamenüba jembidang Trump-i Vice-President Kamala Harris nem Make America Great Again korang ka agütsütsü ta ashir ghonda ishika lir iba ya ataloka liasü.

OFFICE OF THE
CHANGTONGYA SENSO TELONGJEM DIMAPUR
 DIMAPUR: NAGALAND
 Motto: *Telungjem Aser Teyaritep*

TENÜNGSANG AGÜTSÜR

Changtongya Senso
 Telongjem Dimapur (CSTD)
 Dimapur Changtongyatsür
 Telongjem (DCTT) aser
 Changtongya Kaketshir
 Telongjem Dimapur (CKTD)
 ajanga Christian Hr. Secondary
 School Dimapur nung tesayur
 aser Akangmongba kinungtsü
Limanaro nem tenüngsang
 agütsür, shibai District Award for
 Teachers 2024, Govt. of Nagaland
 Department of School Education
 nguteta liasü.

Union-i la takok pela agizüker aser tarutsü wadang asoshia sarasademtsür.

Sd/- President, CSTD Sd/- President, DCTT Sd/- President, CKTD

North Korea-i short-range ballistic missiles khadok

Seoul, Rongjui/Sept. 12 (Agencies): North Korea-i par linük anüdok tzükumlen short-range ballistic missiles ishika khadok, ta South Korea aser Japan-i ashir.

North Korea lenir Kim Jong Un-i par tsükchir den raratsü atema nuclear force renema alitsü nangzüker anogo ishika lir missiles ya Brehostibarnep 7:10 ako meta khalokja liasü.

South Korea indang Joint Chiefs of Staff ajanga ashiba agi, North Korea yimtiba Pyongyang nungi khaloktsüba

missiles ya kilometre 360 (220 miles) arur Korean Peninsula aser Japan tsüngta tzüym nung tsükba putet.

"North Korea-i missile khadokba onoki kanga aitsür, koba rara mesüba tejangja lir aser Korean peninsula nung yimjung amokmerener," ta sangdong ajanga ashi.

South Korea-ibo missiles ya kwi khaloktsüar mashi saka Japan indang Ministry Defence-i ashiba agi, ballistic missiles ya tajemba agi ana bo khaloktsü.

Israel-i Gaza school amakdang UNRWA staff trok tepset

Gaza City, Rongjui/Sept. 12 (Agencies): Israel-i central Gaza nung UN agency for Palestinian refugees (UNRWA) ajanga lapoka aliba school ki ka nung tayimtsü amshia amakdang yangji inyaker nisung trok tepsetogo, ta ashi.

Gaza nung aliba Hamas meyong Civil Defence agency ajanga ashiba agi, Bodhbarnü Nuseirat refugee camp nung aliba al-Jaouni school nung amakdang nisung 18 tepset, koba Palestine nunger meyrirjang aika jenoktsü asoshi amshia liasü.

Iba school nungi amaktsü sentong aliba kiralongrar dak mezüng-mezünga amak aser civilian dak mokongshitsü mera agiogo, ta Israel mitkari ashir.

Iba tesem amakba UN Secretary General António Guterres-i aitsü aser "Gaza nung kechi ataloker, ya khenyongi magizüker," ta ashi. "International humanitarian law nung yamai aibelenba ya tangsa anentsüla," ta pai social media X nung ashi.

October ita Israel aser Hamas tsüngta rara tenzüker tatalokba ka nung ozü staff timba asüba lendong tulutibaji ibai lir, ta UNRWA ajanga ashi.

Testüiba ita 11 tsüngta iba school nung amakba tan agi ponguben buba alitsü, ta parnoki ashir.

July ita iba tesem amakdang

nisung 16 tepset, koba Hamas teloki amshiba structure kar amak, ta Israel mitkari shia liasü.

Guterres-i aitsüba Israel indang ambassador to UN, Danny Danon-i magizük.

"Hamas-i maneni tetsür aser tanurtem jong ama amshidang Israel-i kiralongrar anema raraba UN-i maneni aitsüba ya magizükter," ta pai ashi.

Israel, UK aser danga linük temi kiralongrar telok ta tenüng jalokja aliba Hamas-i military maparen atema school aser danga civilian tem aliba tesemtem mamshir ta ashir.

October 7 nü Hamas teloki Israel south tsütsü maka nisung 1,200 shi tepseter nisung 251 pua bener Gaza-i aoba asoshi telangzüba agüja Israel sepaitemi Hamas samatsütsü rara ya tenzüker.

Iba sülen Gaza nung nisung 41,080 dak tema tepsetogo, ta yangji aliba Hamas meyong health ministry ajanga ashir.

Bodhbarnü amakba sülen tangokba video tem nunga nisung noklang aikati al-Jaouni school indang kongsang ka kanga sashia raksatsür aliba repranga liasü.

Video danga kar nung yirur aliba tetsür, tebur aser tanur tem Deir al-Balah jila nung aliba al-Aqsa hospital bushia ambulance nung bener arua liasü.

Iba lendong nung takum jenbur temi ashiba agi, parnok

ki poksar anembangba nungi yateta temai adokdang nisung indang tetsüng-teben poksar alidak ajemshia liasü.

"Ni junga menokdakter," ta nisung kati nisung temang shilem sepa aliba juli ka bener osangbener dang ashi.

"Anogo 340 tashi onok molumi nung alir ama liyonga arutar. Onoki yangi anguba ama Hollywood movie tem nunga mongudang, aser tang onoki aji Gaza nung angur," ta pai ashi.

Civil Defence spokesman Mahmoud Bassal-i Bodhbar aonung ashiba agi, iba tesem nung nisung 18 tepset aser yangji UNRWA staff züngsemte, tanur aser tetsürtem dena lir, aser ano nisung 18 yiru.

UNRWA ajanga Telegram post ka nung ashiba agi, tepseter rongnung tetsür ka parnok indang rescue workers Momin Salmi jala lir. Pai Shadia ya ita 10 shi kongui liasü, kechiaser pa northern Gaza nung lir aser pa kinungtsü aser tanur ti ya south tsütsüi jena ao.

Iba lendong nung asür nisung 15 temam al-Aqsa hospital bushia bener aru, ta Nuseirat camp nung aliba al-Awda hospital indang osang ka ajanga ashi.

Al-Jaouni school telung nung amenoka aliba Hamas command aser control centre ka nung kiralongrar dak mezüng-mezünga tayimtsü amshia amak, ta Israel Defense

Forces (IDF) ajanga ashir.

"Civilian tem lendongi meyoktsü mechi precise munitions, aerial surveillance amshiba den itdangiter densema mera aika agia liasü," ta parnoki ashi.

"Iba yagi Hamas kiralongrar temi international law nung aibelenba civilian infrastructure amshiba tatishitsü tali sayur."

Tetsür aser tanurtem timba sür nisung 12,000 shi jenoka aliba school aser temeket nung tayimtsü amshia anaben amak, ta UNRWA ajanga ashi.

"Asürtem rongnung UNRWA shelter manager ka aser pei ki yutsür tesem balala nung jenoka aliba nisungtem nem teyari agütsür team züngsemtem dena lir," ta ashi.

Iba agency yagi school aser danga civilian ki o jen tem mapang ajak nung kumzüka ayutsüla ta ashi.

Iba lendong ya matalokdang Gaza nung parnoki lapokba school shilem 70 jungnüa nung rara mapang kongshiogo, ta UNRWA ajanga shia liasü.

Parnoki lapokba school aser danga ki o jen nung jenoka aliba nisung 563 aser staff züngsem 214 tepsetogo, ta ashi.

Israel-i UNRWA staff noklang aika kiralongrar telok nung züngsem lir ta Israel-i aitsü saka UN-i April ita asadangba nung Israel-i kuli tejangja magütsü ta bushitet.

Japan Ato Kilonser Fumio Kishida-i ketdangsurtem dang rong aser tayimtsü kumzüka ayutsü totuyuba agütsü. Teraksa agütsüba osangbo mali.

South Korea, Japan aser United States indang nuclear envoy tem phone ajanga jemi aser iba ya United Nations pangzüng nung aibelenba lir ta ashi, ta Seoul indang Ministry of Foreign Affairs ajanga sangdong ka nung ashi. North Korea-i rara mesüba nung telangzüba agütsütsü parnoki pangjem.

South Korea aser Japan nem Washington indang security commitment masetshi "ironclad" ama lir, ta US Indo-Pacific Command-i nenshia ashi.

Iba ya ita ana dak tema nung North Korea-i yimjak nung nok-nü khashishiba mezüngbuba liasü.

July 1 nü North Korea-i "superlarge" 4.5-tonne-class warhead abentsü akokba tactical weapon tasen ka tendangogo ta shia liasü.

North Korea kumteter kum 76 ajungba anogomung Hombarnü sentong ka nung jembidang, US aser par tembar linük den raratsü asoshi nuclear force renema alitsü maparen asendenshir inyaktsü, ta Kim-i shia liasü.

US-i aniba regional military bloc ulushia akumba ajanga North Korea timtem tulu ajurur, ta pai ashi.

T.G English School Manipur-i 63rd Subroto Cup Junior Boys takok nguogo



New Delhi, Rongjui/Sept. 12 (Agencies): Manipur nungi T.G English School-i 63rd Subroto Cup International Football Tournament indang Junior Boys title ngutetogo, shirnoki Meghalaya nungi Myngken Christian Higher Secondary School den final asayaba mapang 1-1 nung draw asüba sülen sudden death tie-breaker ajanga 4-3 agi takok angu.

Namdigong-i Manipur asoshi minute 32 buba nung goal ka ya agütsütet, saka asaya atemtsü minute trok dang lia Banpliebok Khongjoh-i minute 64 buba nung spot nungi Meghalaya asoshi goal ka agütsü.

Küm 43 sülen takok anguba Manipur telok ya minute 20

jungnüa asayar parnok 10 dang asaya liasü.

Air Chief Marshal VR Chaudhari PVSM AVSM VM ADC, Chief of the Air Staff and Chairman, Subroto Mukerjee Sports Education Society (SMSSES) aser 2022 Asian Games double silver medallist Harmilan Bains nati takok angur nem trophy amokja liasü.

Asaya tetenzük nungi tatem tashi Meghalaya tsütsüi amokbanger asaya liasü, saka parnok goal agütsütsü sempet agi anünga liasü.

Iba asayamung takok angur nem senpet sen 5,00,000 aser runner up nem senpet sen 3,00,000 agütsü. Semi-finals nung tamakok ajurur team shia sen 75,000 aser quarterfinals

nung tamakok ajuruba team shia sen 40,000 agütsü.

Subroto Cup Junior category nung match 75 asaya liasü, koba Delhi aser NCR nung aliba Tejas Football Ground, Ambedkar Stadium, G.D Goenka World School aser KIIT Global School nung asaya.

Junior Girls (U 17) category final nung Mother's International School, Ranchi, Jharkhand-i Bangladesh Kira Shikkha Protisthan madak takok angu aser Sub-Junior Boys (U 15) category nung Nongiri Presbyterian Secondary School, Ri-Bhoi, Meghalaya-i final nung Major Dhyanchand Sports College, Uttar Pradesh madak takok angu, koba Bengaluru nung asaya liasü.

Rohan Bopanna Tennis Premier League Season 6 nung asayatsü



Rongjui/September 12, 2024 (Agencies): Taoba mapang World Number 1 Rohan Bopanna Tennis Premier League Season 6 nung asayaba angütsü. Bopanna tang tebur tarep asaya nung jenjang 6buba nung lir.

Bopanna ya India nunger tennis asayartem rongnungi takok tajungtiba anguba asayartem rongnung ka lir aser pa taküm mezüngbuba Tennis Premier League nung asayaba angütsü.

Arishi küm 44 tain Bopanna, shibai Grand Slam ana (Australian Open tebur tarep asaya 2024 aser French Open tarep temeyoktep asaya 2017) koka lir pa India tentüng nungi Olympic asem tashi nung asayaago.

Bangalore nungi asayar ya World No. 1 akümba asayartem rongnung tambusang asayar lir. Taküm küm January ita World No. 1 jenjang tongtetba sülen pai iba otsü tasen yanglua liasü.

Pai pa indang career nung title 25 dak tema benogo aser pa ya Leander Paes, Mahesh Bhupathi aser Sania Mirza nunger sülen World No. 1 jenjang tongta atuba India nunger asayar pezübuba-ang lir.

Pa küm 20 shi ATP Tour nung asaya arudar aser pa tang TPL nung asaya yimya tasen nung asayatsü. Asayamung nung franchise ajak semi-finals atema qualify asütsü asoshi asaya pongungu asayatsü.

Franchise ana asayaba ajak nung tebur kija asaya, tetsür kija asaya, tarep temeyoktep asaya

aser tebur tarep asaya alitsü. Asaya shia point 100 angütsü maangka alitsü aser category shia ya point 25 asütsü. Team ajak league stage nung point 500 atema asayatsü temaba jenjang nung tembangba team 4 semi-final atema qualify asütsü.

Iba asayamung nung Bopanna ya, Sumit Nagal, France nunger asayar Hugo Gaston aser Armenia tsür Elina Avanesyan nunger den külemi asayaba angütsü. Iba asayamung ya Cricket Club of India nung asayatsü.

“Ni Tennis Premier League nung shilem agitsü yongyaseta atar. Iba amala asayamung ka nung shilem agia küm tembangtsüji kanga tetemsü asütsü. TPL amala asayamungtem, koba ajanga grassroots terenlok nung teyari agüja arudar, iba ajanga lanur asayartem aika ajungmesotsü imlar,” ta Bopanna-i ashi.

Kasa mapang nung Tennis Premier League Co-Founder, Kunal Thakkur-i, “Rohan Bopanna adenba atema kanga pelar. Pa adenba ajanga TPL season 6buba tajungba kümdaktsüba dang masü saka tanga asyartema tera talila ajungmesotsü imlar,” ta ashi.

Zunheboto nung 11buba Inter-departmental asayamung tenzükogo

Dimapur, Rongjui/September 12 (TYO): 11buba Zunheboto district nung tenzükogo.

Iba asayamung ya District Sports Council, Zunheboto aser District Administration na sentepa ayongzük asayadaki.

Asayamung lapokba sentong nung alakteta jaoker ama o jembiba mapang Deputy Commissioner Zunheboto, Rahul Bhanudas Mali, IAS-i, asayamung nung shilem agir ajak dang sportsmanship tanüla tajungtiba sayutsü ajungshia liasü. Paisa, asayamung ayongzükba committee aser district kübok department ajak nem tenüngsang agütsü aser ashiba agi, sorkar kübok tenzükertem ajak longjemtsü atema iba

asayamung ya mapang tajung ka lir ta ashi.

Maneni Deputy Commissioner-i asayamung indang wako atsüketsü aser iba asayamung tenzükba sangdonga liasü.

Asayamung lapokba sentong ya ADC Zunheboto & tournament convenor, Keyirangding Hegui lenisüba nung agi aser DSCZ züngsem Zhekugha Assumi-i lokti pela agizükba o jembiba liasü.

Maneni DPO & DSCZ züngsem, David Sema-i achaayanga asayartem tenangzüktepba agi.

Inter-Departmental asayamung nung Badminton, Carrom, Chess aser Penalty Shootout asayatsü. Iba asayamung nung department 43 nungi asayar 367-i shilem agidar.

Mikel Arteta-i Arsenal den tenangzüktepba yanglushiogo



Rongjui/September 12, 2024 (Agencies): Arsenal manager Mikel Arteta-i iba Premier League club den ano küm asem atema tenangzüktepba yanglushitsü mulunga agizükogo, ta osang ajanga metetdaksü.

Arishi küm 42 tain coach lenisüba nung Gunners pur 2019 küm nungi asaya arudar aser parnok season anabuba atonga tanabuba jenjang nung tembangogo.

Arteta-i taoba ita pa transfer window dak rangloker lir aser pa indang contract dak sendakba nung kecha bilema maliasü ta ashi.

Arsenal pur Premier League nung Deobarnü Tottenham den asayatsü lia tang pa den tenangzüktepba tasen yangluogo.

Unai Emery melena Arsenal coach mapa abentsü atema Manchester City nung coach mapa toktsüba sülen Arteta-i, iba club nungi takok marok ngutetogo aser Premier League nung title atema toktepba club ka kümdaktsüogo. Pa taoba mapang iba club nungi asaya liasü.

Pa club nung mezüngbuba season inyakba mapang parnoki

FA Cup koka liasü.

Premier League nunga parnok taoba season ana tanabuba jenjang nung tembang aser parnoki champions Manchester City kanga nongshia asayaago.

Season tasenba nung Arsenal pur tang point table nung pezübuba nung lir. Parnoki tang tashi nung asaya ana kokogo aser ka draw süa lir. Parnok Champions League-a taruba hopta Atalanta den asaya-a tenzüktsü.

Iba hopta tatem i Arteta-i aniba team ya North London derby nung Tottenham Hotspur den asayatsü lir, ajisüaka Arsenal pur tongtibang asayar kar yirur lir aser iba ajanga tetsükdaksü adoktsü akok. Norway team nungi Austria den asayaba mapang Martin Odegaard ya tetsüng teloktep yirua liasü aser pa September 15 nü Tottenham den asayatsü aliba asaya nung masayatetsü ta bilemer.

Kasa mapang nung Declan Rice-a iba asaya nung shilem magitetsü aser Italy nunger asayar Ricardo Calafiori-a iba asaya nung masayatetsü akok, kechiyong pa Italy aser France na asayaba mapang yirua liasü.

BILEMDANGANG

“Anogoji nai azüokang; anogo nem na tazüokdaksü.”